



4 187 022 0133 0012

Астана қаласында жаһандық инвестицияға арналған дөңгелек үстел өтті. Іс-шараға жетекші халықаралық компаниялар, инвесторлар, беделді сарапшылар, салалық министрліктер, квазимемлекеттік компаниялардың басшылары, отандық кәсіпорындардың 500-ден астам өкілі қатысты.

Аймақ басшысы Ералы Тоғжанов бастаған Ақтөбе облысы делегациясының құрамында мемлекеттік органдар мен жетекші өндірістік кәсіпорындардың басшылары болды.

«Ақтөбе облысы — еліміздегі экономикалық және стратегиялық маңызы зор Қазақстандағы ең ірі өңір. Аймақ — хром, титан, никель қоры бойынша дүниежүзінде көшбасшы. Оның аумағында көмірсутегінің болжамды қорының 30 пайызы шоғырланған, өнеркәсіптік мұнай қоры республика бойынша үшінші орында. Біз таза, инновациялық және әртарапталдырылған экономикалық модель ұстанып келеміз. Біздің міндетіміз — инвесторларды тарту және жан-жақты кешенді қолдау», — деп атап өтті Ералы Тоғжанов.

Дөңгелек үстел мен пленарлық отырыстар аясында әлемдік экономиканың дамуы, инвестициялық тартымдылық және Қазақстанның жаһандық және аймақтық инвесторлар үшін мүмкіндіктер, жаңа экономикалық жағдайдағы азық-түлік қауіпсіздігі және логистика мәселелері талқыланды.

Ақтөбелік бизнес-қоғамдастықтың өкілдері серіктестерді іздеу, өткізу нарығын кеңейту үшін диалог алаңын тиімді пайдаланды. Шетелдік серіктестермен B2B форматында бірқатар кездесу өткізіп, әлеуетті жобаларды жүзеге асыру мәселелерін талқылады.

Шетелдік қатысушыларды бірнеше компаниялардың қызметі ерекше қызықтырды. Олардың қатарында «Gas Processing Company» ЖШС бар. Кәсіпорын 2018 жылдың желтоқсан айында «Қоқасай» кен орнында қуаттылығы жылына 300 000 000 текше метр ілеспе мұнай газын көдеге жарату бойынша заманауи зауыттың құрылысын аяқтады. EASY компаниялар тобы 2009 жылдан бастап мұнай мен суга арналған өнеркәсіптік химиялық заттарды өндірумен айналысады. Компанияға қарасты зауыт өртүрлі химиялық реагенттерді өндіруге қажетті барлық заманауи жабдықтармен жабдықталған және жылына 9 мың тоннаға дейін өнім шығарады. «Қазақстан мұнай жабдықтары зауыты» ЖШС Қазақстан-Қытай бірлескен кәсіпорны мұнай-газ саласына қажетті өнім шығаруда әлеуеті зор. Кәсіпорынның қуаттылығы — жылына 50 мың тонна.

Іс-шара қорытындысында металлургия, құрылыс, денсаулық сақтау, экология және логистика салалары бойынша жалпы құны 735 миллион АҚШ доллары болатын 5 меморандумға қол қойылды.

KGIR 2022 барысында қол жеткізілген келісімдердің қатарында мультимодальды көлік-логистикалық хаб салу жобасы бар.

Хаб аймақтық көлік-логистикалық жүйенің негізгі элементіне айналады деп күтілуде. Ол барлық қатысушылардың келісілген өзара іс-қимылын, сондай-ақ көліктік, инвентарлық, сервистік, ақпараттық және қаржылық ағындарды біріктіруді қамтамасыз етеді.

Жобаның өзектілігі — облыстың көлік-логистика тұрғысынан қолайлы орналасуы,

KGIR 2022: ОБЛЫС ӘКІМІ ЕРАЛЫ ТОҒЖАНОВ 735 МИЛЛИОН ДОЛЛАРЛЫҚ КЕЛІСІМДЕРГЕ ҚОЛ ҚОЙДЫ



экономикалық әлеуетінің қарқынды дамуы, қалыптасып келе жатқан Ақтөбе агломерациясы және миллион тұрғыны бар қала болу жоспарына байланысты екенін айта кету керек.

ҚАЗАҚСТАНДАҒЫ ЕҢ ІРІ БОЛАТ БАЛҚИТУ ЗАУЫТЫ БІЗДЕ САЛЫНАДЫ

Kazakhstan Global Investment Roundtable отырысы аясында облыс әкімі Ералы Тоғжанов пен «QazSpetsSteel» ЖШС басшылығы болат балқыту зауытының құрылысы бойынша меморандумға қол қойды.

— Зауыт қазақстандық өндірістегі темір рудасы, флюс, ферроқорытпалар мен отынды пайдаланудағы бірегейлігімен ерекшеленеді. Бұл шетелдік жабдықтаушыларға деген тәуелділіктен толығымен арылуға мүмкіндік береді. Жобаның өңір үшін де, жалпы ел үшін де маңызы өте зор. Оны жүзеге асыруда жан-жақты қолдау көрсетуге дайынбыз, — деді меморандумға қол қойғаннан кейін аймақ басшысы.

Жоба қазақстандық өндірушілерді рельстер, теміржол дөңгелектерін, құрылыс аматураларын және пішінді болаттарды өндіруге арналған блюмдер, дайындамалар-

мен қамтамасыз етеді. Бұл жылына жалпы жиынтығы 990 миллион долларға дайындамалар мен құрылыс арматураларының импортынан арылтады және қазақстандық прокат өндірушілерді сапалы дайындамалармен қамтамасыз етеді.

«QazSpetsSteel» ЖШС жобаға 587 миллион АҚШ долларын инвестициялайды. Зауыттың қуаттылығы — жылына 800 мың тонна өнім. Зауыт толық қуатында жұмыс істегенде 1500 адам жұмыспен қамтылады.

ЖАҒЫМСЫЗ ИІСТЕН ҚҰТЫЛУДЫҢ АЛҒАШҚЫ ҚАДАМЫ

Ақтөбе өнеркәсібі дамыған облыс болғандықтан, ірі өндіріс ошақтары қоршаған ортаға өз әсерін тиізіп отырғаны белгілі. Өңірде су айдындарының ластануы мен тозуы, қалдықтардың жиналуы және қолданыстағы көріз суларын тазарту қондырғыларының ескіруі сияқты бірқатар экологиялық проблема бар.

Қазіргі таңдағы өзекті экологиялық мәселелердің бірі — көріздік тазарту қондырғыларынан шығатын жағымсыз иіс. Өбден тозығы жеткен қондырғылар қайта жөндеуді қажет етеді.

Облыс басшылығы экологиялық проблемаларды тез арада шешу міндетін қойып

отыр. Осыған байланысты қоршаған ортаның сапасын жақсарту бойынша шаралар қолға алынды. Көріз жүйесін қайта жасау және жөндеу, өндірістік қалдықтарды тазартудың жергілікті жүйелерін орнату, қоқыс жинағыштарды жою және т.б. жұмыстары жүргізілуде.

Осы мақсатта ұзақ уақыт бойы қолданыста болған көріздік тазарту қондырғыларын жаңғырту бойынша келіссөздер жүргізілді. Алайда аймақ басшысы Ералы Тоғжанов бұл шара уақытша нәтиже береді және жаңа көріздік тазарту қондырғыларын салу қажеттілігі туындайды деп есептейді.

«Еуропалық қайта құру және даму банкі» инвестициялық жобаны қаржыландыруға дайын.

Kazakhstan Global Investment Roundtable барысында облыс әкімі Ералы Тоғжанов пен ЕКДБ Қазақстан бойынша директоры Хусейн Озхан өзара түсіністік туралы меморандумға қол қойды.

Көріздік тазарту қондырғысын салу жобасы ластануды айтарлықтай азайтып, суаруға жарамды ағынды сулардың сапасын арттырады, қаланың санитарлық-эпидемиологиялық ахуалын жақсартады. Ағынды суларды тазарту үшін заманауи энергия үнемдейтін технологияларды және анағұрлым жетілдірілген жабдықтарды пайдалану қарастырылған.

Жоба құны — 30 миллиард теңге. Кәсіпорынның қуаттылығы тәулігіне 100 мың текше метр болады.

БИТУМ ТАПШЫЛЫҒЫ БОЛМАЙДЫ

Ақтөбе облысы битумға деген өз қажеттілігін толығымен өтеп, қажет болған жағдайда еліміздің батыс аймағын тұтастай шикізатпен қамтамасыз етуді көздеп отыр.

Ақтөбе облысының әкімі Ералы Тоғжанов пен «ҚазақБитум» ЖШС басшылығы Астанада өткен Kazakhstan Global Investment Roundtable отырысы барысында инвестициялық ынтымақтастық туралы келісімге келді.

Битум зауытын салу туралы келісім — KGIR 2022 форумында қол қойылған маңызды құжаттардың бірі. Соңғы жылдары жолдарды жөндеу және салу жұмыстары қарқын алған Ақтөбе облысы үшін келешегі бар жобаға «ҚазақБитум» ЖШС бастамашы болды.

Биыл облыста 663 шақырым жол жөнделеді. 2023 жылы 516,3 шақырым жолды жөндеу жоспарланған, оның 465,7 шақырымы — жергілікті маңызы бар, 50,6 шақырымы — кеш-жол желісі.

Айта кету керек, Ақтөбе облысында биыл битум тапшылығы мен құнының қымбаттауына байланысты кейбір кәсіпорындар жұмыс қарқынын бәсеңдетуге мәжбүр болып, жұмыс кестесін өзгертіп, жолды уақытылы

тапсырылмау қаупін арттырды. Бұл мәселе облыс әкімінің Шымкенттегі зауыттан битумын қосымша көлемін жедел жеткізу туралы келісімінің нәтижесінен кейін оң шешімін тапты.

Бұл мәселені жүйелі шешу үшін Ералы Тоғжанов Ақтөбе облысындағы битум қоймаларының қуаттылығын арттырып, қыс мезгілінде сұраныс аз кезде битум сатып алуды барынша арттыру міндетін қойды.

Облыс басшылығы жол желісін дамытудың алдағы перспективаларын ескере отырып, «ҚазақБитум» ЖШС-мен Ақтөбе облысында битум зауытын салу туралы келісімге келді. Ауыр мұнайдан, мазуттан, гудроннан жоғары сапалы битум өндіру, өртүрлі маркадағы битумдарды ауыстырып тиеу және маусымаралық сақтау жобасын жүзеге асыру жұмыстары 2023 жылдан басталады.

Зауытта тәулігіне 500 тоннаға дейін битум эмульсиясы және 1000 тоннаға дейін жол, құрылыс және шатыр битумдары шығарылатын болады.

Құны 50 миллион доллар тұратын жоба іске қосылғанда 100 жұмыс орны ашылады.

ЖАҢА ОРТАЛЫҚ БАТЫС ӨҢІРІНІҢ МЕДИЦИНАСЫН ДАМУАДА

KGIR-2022 аясында облыс әкімі Ералы Тоғжанов түркиялық «OrhunMedical» компаниясының Басқарма төрағасы Гөненч Дырыкпен денсаулық сақтау саласындағы жобаны жүзеге асыру туралы меморандумға қол қойды.

2022 жылдың қыркүйек айының соңында өткен кездесу барысында Ақтөбе қаласындағы Ядролық медицина және томотерапия орталығымен «OrhunMedical» көпсалалы клиникасын салу, екі позитронды эмиссиялық томография, сондай-ақ бір фотонды эмиссиялық компьютерлік томография орталықтарын ашу туралы келісімге қол жеткізілген болатын.

Астанада өткен шара барысында тараптар ынтымақтастық ниеттерін бекітті. «OrhunMedical» компаниясының инвестиция көлемі — 35 миллион доллар.

Бірегей медициналық орталық әлемдік озық әдістер негізінде онкологиялық ауруларды жөндеңді диагностикалауды жүзеге асырады. Позитронды-эмиссиялауды жүзеге асырады. Көпсалалы клиникалық томографияны қолдану арқылы алғашқы клиникалық көріністер болмаған кезде онкологияны ерте кезеңде анықтауға мүмкіндік береді.

Ядролық медицина орталығының өндірістік қуаты — айына 6000 ОФЭКТ/КТ және 8000 ПЭТ/КТ.

«Маңызды жобаның арқасында еліміздің батыс өңірінің тұрғындары жоғары білікті мамандандырылған медициналық көмекке қол жеткізе алады. Орталықтың қызметі Ақтөбе қаласының медициналық туризм саласындағы тартымдылығын арттыруға ықпал ететініне сенімдімін. Біз оның салуына мүдделіміз және оны жүзеге асыруға жан-жақты көмек көрсетуге дайынбыз», — деп баса айтты облыс әкімі.

Жоба жүзеге асса, 200 жұмыс орны ашылады.

Ақерке САТЫБАЛДЫ.



Құтқарушылар күні

ЕР СЫНАЛАР ЕРЕКШЕ МАМАНДЫҚ

Ақтөбелік құтқарушылар кәсібі мерекесін атап өтті. Шығармашылық академиясында ұйымдастырылған салтанатты шараға облыс әкімі Ералы Тоғжанов қатысып, облыстық төтенше жағдайлар департаментінің ардагерлері мен мамандарын кәсіби мерекемен құттықтады.

Облыс әкімі алдымен академияның алдына қойылған жаңартылған техникалар көрмесін аралады. Өңірде жыл сайын Төтенше жағдайлар қызметінің адами әлеуетін арттыруға, материалдық-техникалық базасын жақсартуға мемлекет тарапынан жан-жақты қамқорлық жасалуда. 2021 жылы департамент автотопары 30 жаңа өрт сөндіру техникасымен толықты. Облыстағы мемлекеттік өртке қарсы қызметі жоқ елді мекендерінде бірнеше өрт сөндіру бекеті құрылды. Ал 2022 жылы жол қарталарын іске асыру шеңберінде өртке қарсы ерікті құрылымдардың қажеттіліктері үшін 55 бірлік өрт мотопомпасы, 335 бірлік ранцты өрт сөндіргіштер және 113 бірлік арнайы киім және су тасымалдауға арналған 7 тіркеме сатып алынды. Бұл бағыттағы жұмыс жалғаса береді. Облыстық төтенше жағдайлар департаментінің басшысы Марғұлан Аманбаев жұмыс барысында дрон қондырғыларының да пайдасы орасан зор екенін жеткізді. Бүгінгі таңда облыс орталығынан басқа, департамент-

тің 3 аудандағы бөлімдерінде дрон қондырғылары бар. Облыс әкімі аталған құрылыммен барлық ауданның қамтылуы керектігін айтты.

Мерекелік шара басталмас бұрын жиналғандар төтенше оқиға кезінде қаза тапқан әріптестерін бір минут үнсіздікпен еске алды. — Биыл елімізде төтенше жағдайлар қызметінің құрылғанына 27 жыл толды. Осы жылдар ішінде оқыс оқиғалардың алдын алу және жою жұмыстары бойынша біршама жұмыс атқарылды. Құтқарушы жасақтарымыз халықтың сеніміне ие болды. Жаңа қызмет барысында қаза тапқан азаматтарды үнсіздікпен еске алдық. Олар елдің мәңгі есінде.

Адам басына қауіп-қатер төнген кезде алдымен сіздердің көмектеріңізге үміт артамыз. Сіздер тәуелі бойы тәуекелге бел буып, қиындыққа тап болған жандарға көмек көрсетуге дайын тұрасыздар. Жамбылдағы, Қостанайдағы өрт кезінде де ақтөбелік төтенше жағдайлар департаментінің қызметкерлері үлкен ерлік көрсетті.

Батыл, кәсіби деңгейі жоғары мамандарға алғыс айтамын.

Құрметті ардагерлер, құтқарушылар мен өрт сөндірушілер, кәсіби мерекелеріңізбен шын жүрекпен құттықтаймын. Зор денсаулық, жауапкершілігі мол қызметтеріңізге табыс, отбасыларыңызға амандық тілеймін. Халықтың алғысына бөлене беріңіздер! — деді облыс әкімі.

Бұдан соң өңір басшысы төтенше жағдайлар кезінде адам өмірін арасалауды кәсібіне айналдырып, жанқиярлығымен, батылдығымен Отан алдындағы борышын адал атқарып жүрген бірқатар құтқарушыны Алғыс хатпен марапаттады.

Шара барысында әріптестерін мерекесімен құттықтаған департамент басшысы Марғұлан Аманбаев Отан алдындағы қызметтерін адал орындап жүрген қызметкерлерге Төтенше жағдайлар министрлігінің медальдарын, Алғыс хат пен Грамотасын табыстады.

Шара барысында Төтенше жағдайлар министрі Юрий Ильин департамент ұжымына бейнеқұттықтауын жолдады.

Құтқарушылар күніне арналған мерекелік шара қалалық Мәдениет

үйінің ұжымы ұйымдастырған концертке жалғасты.

Кеше Ақтөбе қаласының әкімі Асхат Шахаров облыстық төтенше жағдайлар департаментінің он қызметкерін кәсіби мерекелерімен құттықтап, оларға Алғыс хат табыс етті.

— Ресми статистикаға жүзеге асырылған өңірлік деңгейде 9 мыңға жуық авариялық-құтқару жұмысы жүргізілсе, жүзден астам адам құтқарылып, 900-ден астам тұрғын төтенше жағдайлар кезінде қауіпсіз жерге көшірілді. Міне, осындай қиын-қыстау кезде сіздер тұрғындарға көмектесіп, өз өмірлеріңізге келетін қауіпке қарамай, қол ұшын создыңыздар. Сондықтан сіздерге кәсіби мерекелеріңізде ерекше алғыс айтқым келеді. Баршаңызға еңбекте табыс, дендеріңізге саулық тілеймін. Еліміз аман, жұртымыз тыныш болсын! — деген шаһар басшысы бір топ азаматтық қорғау саласының қызметкеріне Алғыс хат пен естелік сыйлық табыс етті.

Марапатталғандардың қатарында азаматтық қорғау майоры Талғат Көкшин, азаматтық қорғау аға лейтенанты Қайрат Көшекбай, азаматтық қорғау лейтенанты Ислам Илеуов, азаматтық қорғау кіші лейтенанты Данияр Әжіғұлов, азаматтық қорғау аға сержанты Қанат Сүлейменов, азаматтық қорғау кіші сержанты Айдын Қойшыбаев, азаматтық қорғау аға сержанты Абылайхан Бержанов, азаматтық қорғау кіші сержанты Жанболат Ахметов, азаматтық қорғау старшинасы Адай Сембин мен Талғат Мұрзалиев бар.

Данагүл ҚАЗИХАН.

«БАЗАРЛАРДА ЖЕРГІЛІКТІ ТАУАР ӨНДІРУШІЛЕРДІҢ ӨНІМДЕРІНЕ БАСЫМДЫҚ БЕРІЛУІ КЕРЕК»

Облыс әкімі Ералы Тоғжанов қаладағы «Табыс» коммуналдық базарының жұмысымен танысты. Базардағы орындарды жалға алып отырған саудагерлермен тілдесіп, азық-түлік өнімдерінің бағасын қарады.

— Аудандардағы тауар өндірушілер өнімдерін облыс орталығында сататын жер жоқтығын айтып шағымданып жатады. Олай болмауы керек. Кез келген тауар өндіруші ешқандай деградациясыз өнімін тікелей сереге өкіліп сата алатындай жағдай жасауымыз қажет. Базарларда жергілікті тауар өндірушілердің өнімдеріне басымдық берілуі керек, — деді облыс әкімі.



Ералы Тоғжанов базар әкімшілігі мен тиісті мекеме басшыларына сауда орындарының сырты мен ішіндегі санитарлық талаптарды, баға тұрақтылығын қадағалау керектігін тапсырды. Басты талап — жергілікті ауыл шаруашылығы тауар өндірушілерінің нарыққа өркін шығуын қамтамасыз ету.

Облыс әкімі бал өндірісімен айналысатын шаруалармен тілдесті. Омарташылар облыс басшысына өздерін толғандырған мәселелерін жеткізді.

— Облыста, өкінішке қарай, тұрғындарды балмен қамтамасыз ету деңгейі төмен. Сондықтан бұл бағытта бірлесіп, жүйелі түрде үлкен жұмыстар жасауымыз керек. Мен сіздерді әрқашан қолдаймын. Қаладағы сауда орындарынан орын беру мәселесін де шешеміз. Сіздерден сапалы өнім талап етіледі. Сапа болған жағдайда сауда да болады, — деген Ералы Тоғжанов бұл мәселелердің барлығын «Ауыл аманаты» аясында шешуге болатынын айтып, омарташыларды жобаға белсене атсалысуға шақырды.

А.МӘЛІКҚЫЗЫ.